

## Biegau i tieviškė

Vėn biegau i tieviškė pavasarė takās,  
Kor vuobėlelės žīdiejė.  
Kor eglīu sėinas ė pėrtelė sena,  
Kor neužpūtė viejė.

Biegau žėima par pūgas, par viejus.  
Longeliūs speigā žīdiejė.  
Sėdabrėnės takās i Jedžiutos:  
Muociutė aplonkītė reikiejė.

Biegau vasara, ka žuolīnā svaigėna, kvepiejė,  
Par Gontėna brėdau.  
Atsėtrėnkiau kāp i mūra sėina –  
Muociutės tèn jau nebradau...

I speiga zuona traukėnės be longū  
Kor šerkšnos omžėns spindiejė  
Ėš ož taiguos aukštū begalėniu mėškū  
Sogrīžtė ėš tèn nebgaliejė.

Tèn par naktis suodībelė sava sapnava  
Ė meldies karštā, ė dainiava  
Sunkiausės darbās apkrautė, ėkėnkītė  
Svekata palaiduojė sava.

Gimtuoji suodība kvep jau ėš tuola  
Rogėnės dounelės kvapo.  
Muociutė vėn gluostė kepalus šėltus –  
Nebsogrīš ėš kapū.

Tèn mienulis vėršūnielėipas aukštuosės  
Metus par greita skaičiava  
Jau senė gavau palėkėma muociutės:  
Metū jau tėik torio sava.